

辛壬大政紀第一上

行唐尙秉和節之纂輯

新城王樹枏晉卿

審定

桐城吳闔生北江

獻縣張鼎彝子銘評點

宣統三年正月試辦本年歲出歲入預算初度支部原
送預算表列歲入共庫平銀三萬一百九十一萬二百
九十六兩八錢七分七厘歲出共三萬七千六百三十
五萬五千六百五十七兩經資政院審核增歲入四百
九十四萬七千五百七十四兩八錢五分五厘減歲出

七千七百九十萬零七千二百九十二兩出入兩抵贏
三百四十六萬一千九百三十一兩爲宣統三年預備
費由資政院會同會議政務處具奏詔中外遵守勿得
濫額。法部奏停止刑訊再明詔實行詔京外問刑衙
門恭錄光緒三十一年三月二十一日諭旨懸挂法庭
遵守。

三月戊申兼署廣州將軍副都統孚琦爲黨人溫生才
刺死以四川總督趙爾巽爲欽差大臣調補東三省
總督兼管三省將軍事務擢川滇邊務大臣趙爾豐署
理四川總督以四川布政使王人文爲川滇邊務大臣

爾豐奏辭不允。丁丑，黨人黃興、林文、林尹民等入廣州，燬督署，總督張鳴岐越牆走。水師提督李準以兵與黨人戰，敗之。黃興逃，林文等七十二人皆死，叢葬黃花崗。

四月辛未，特借英、美、德、法四國銀行一千萬鎊。日本正金銀行一千萬圓。乙亥，給事中石長信奏鐵路宜分幹路、支路。幹路應歸國有，支路可許商辦。詔郵傳部議奏。戊寅，內閣軍機處會議政務處同裁撤，設立新內閣。詔授慶親王奕劻爲內閣總理大臣，那桐、徐世昌爲協理大臣，梁敦彥爲外務大臣，善耆爲民政大臣，載澤

爲度支大臣唐景崇爲學務大臣廕昌爲陸軍大臣載
洵爲海軍大臣紹昌爲司法大臣溥倫爲農工商大臣
盛宣懷爲郵傳大臣壽耆爲理藩大臣凡內閣總協理
大臣及各部大臣均爲國務大臣改軍諮處爲軍諮府
以貝勒載濤貝勒毓朗爲軍諮大臣設弼德院以大學
士陸潤庠爲弼德院院長大學士榮慶爲弼德院副院
長資政院以政府借款請開臨時會議不許外務
部奏禁煙滿三年民間淨絕與英使續訂條約已卯
郵傳部覆奏請准如石長信奏明詔曉諭幹路均歸國
有定爲政策所有宣統三年以前部准商修幹路各案

一律取銷由國家收回興築報可。戊子詔起用端方。

充督辦川漢粵漢鐵路大臣御史趙熙歐家廉劾盛宣懷借債賣路罪二十餘款川湘鄂粵諮議局亦抗爭。

五月川人立保路同志會舉諮議局副議長蕭湘代表入都聯合湘鄂京官立鐵路聯合會上書政府暫緩接收。庚子大理院少卿王世琪奏湘路改歸國有請卽停止抽收米鹽捐房捐報可。辛丑湖南巡撫楊文鼎

代奏諮議局呈請湘省鐵路力謀自辦不借債奉旨嚴行申飭癸卯護理四川總督王人文代奏諮議局呈請鐵路暫緩接收復奉旨申飭。總稅務司赫德因病辭

職以安格聯代爲稅務司戊午度支部郵傳部會奏償
還路股辦法報可己未以陳寶琛爲山西巡撫甲

子內閣奏內閣官制首承宣廳法制院次制誥局叙官
局統計局印鑄局裁撤憲政編查館吏部中書科

六月庚午以陸榮廷爲廣西提督龍濟光爲陸軍第二
十五鎮統制官丙子都察院代奏直省諮議局議員
呈請另行組織內閣詔黜陟百司係君上大權載在先
朝欽定憲法大綱並註明議員不得干預不許辛巳

皇帝典學詔大學士陸潤庠山西巡撫陳寶琛授讀副
都御史伊克坦授國語清文壬午以江蘇布政使陸

鍾琦爲山西巡撫。

閏六月庚子陝西巡撫恩壽罷以楊文鼎爲陝西巡撫。余誠格爲湖南巡撫。乙巳趙爾豐至成都奏請撤退川路總理李穆勛郵傳部不從。丁巳以荊州將軍鳳山爲廣州將軍以善耆爲理藩大臣桂春爲民政大臣。廣東水師提督李準爲黨人林冠慈炸擊準躍登屋頂免奉溫詔慰問賞御葯療傷。

七月丙寅朔內閣奏改設內閣官報宣布法令。成都因鐵路官有罷市罷課人民載景皇帝神主游行呼籲。匍伏督轅數萬人並公舉劉聲元阮恒等入都陳情。

辛丑四川鐵路股東會會長顏楷副會長張瀾復請趙爾豐代奏鐵路暫歸商辦俟資政院開會提交議決爾豐與將軍玉琨及司道合詞代奏不許將軍玉琨大憤復單銜奏請仍不許並詔端方率兵一協入川查辦奕劻稱疾不視事遞解川代表劉聲元等回籍成都府嘉定府瀘州府重慶府相繼罷市庚辰趙爾豐逮捕川諮議局議長蒲殿俊等十一人候補道田徵葵因市民騷亂擊斃十數人川亂愈甚民團與防軍迭戰於龍和場龍泉驛成都閉門數日丁亥復詔起岑春煊入川辦理剿撫事宜春煊爲書告誡川民禁川官吏妄殺

復奏請先撤歸宜鐵路督辦李稷勲川人得春煊書亂勢畧定戊子禁煙大臣奏開缺典禮院直學士李擢英前軍機章京孫筭經煙癮未除請革職永不叙用出結官易貞華世奎均罰俸一年

八月丙申監國攝政王校閱禁衛軍庚子岑春煊至

鄂稱疾不行川亂復熾同志軍蠡起壬寅內閣總理

奕劻辭職溫詔慰留郵傳部奏變通部章准四省路

股十成償還虛糜倒虧由部擔認丙午以張勳爲江

南提督張懷芝爲甘肅提督丁未典禮院製定國樂

專章庚戌以度支大臣載澤兼任鹽政院鹽政大臣

癸丑夜湖北兵變總督瑞澂提督張彪棄城走甲寅
武昌城陷乙卯詔奪瑞澂官以陸軍大臣蔭昌率陸軍
兩鎮援鄂并詔海軍提督薩鎮冰長江水師提督程允
和率師赴援丙辰瑞澂劾罷張彪軍諮大臣載濤
奏罷陸軍秋操丁巳詔起袁世凱爲湖廣總督岑春
煊爲四川總督春煊因武昌兵變歸滬戊午詔王人
文撤去侍郎銜開去川滇邊務大臣趙爾豐仍充川滇
邊務大臣己未詔蔡鐸充陸軍第三十七協統領官
瑞澂匿兵輪游弋江中壬戌詔四川湖北匪黨被脅
自拔來歸者原宥不問漢陽兵工廠龜山砲臺皆失守

辛酉廕昌始抵信陽北軍及張彪殘兵與民軍開始戰於劉家廟各省革命黨人因鄂亂蠭起

九月乙丑朔資政院開第二次常會湖南兵變巡撫

余誠格走巡防統領黃忠浩死之黨人焦達峯爲都督

陝西兵變護督錢能訓自戕不殊翌日滿城破將軍

文瑞死之管帶張鳳翔爲都督丙寅九江兵變九江

道保恆知府璞良遜標統馬毓寶爲都督戊辰廣州

將軍鳳山爲黨人炸死己巳資政院奏參盛宣懷手

握交通機關專復擅權於交院協議交閣議決之案一

切不顧於閣制發表之後二日首先破壞單銜入奏罔

上欺民怨苦鬱結上下爭持川亂卽作人心浮動革黨
叛軍乘機竊發該大臣實爲誤國首惡請予嚴懲詔罷
郵傳大臣盛宣懷永不叙用內閣總協理大臣於盛宣
懷朦混具奏時率行署名並交該衙門議處以唐紹
怡爲郵傳大臣端方奏覆查明四川京官曾鑑等所
陳川民爭路實情詔營務處總辦田徵葵貪功妄舉擅
斃民命卽行革職發往巴藏効力署提法使周善培輕
躁喜事候補道王掞王梓結怨紳商聲名素劣均著卽
行革職候補道饒鳳璪資輕望淺著以同知降補釋川
紳蒲殿俊羅綸顏楷等庚午隆裕皇太后特發內帑

銀一百萬兩充湖北軍餉。召陸軍大臣蔭昌回京。以袁世凱爲欽差大臣。所有湖北赴援海陸各軍及長江水師均歸節制。調遣軍諮府陸軍部不得遙制。以一事權。以馮國璋總統第一軍。段祺瑞總統第二軍。北軍奪據漢口大智門。王申山西兵變。巡撫陸鍾琦協統譚振德死之。革軍舉標統閻錫山爲都督。瑞澂電奏因兵艦煤盡。至九江。因九江兵變。至上海。詔江督拏解來京治罪。癸酉。雲南兵變。總督李經羲走。布政使世增鎮統鍾麟同營務處總辦王振戡死之。革軍舉協統蔡鍔爲都督。皇帝下詔罪已曰。朕續承大統。於今三

載競競業業期與士庶同登上理而用人無方施治寡
術政地多用親貴路事朦於僉王馴致怨積於下而朕
不知禍迫於前而朕不覺川亂首發鄂亂繼之今則湘
陝警報迭聞粵贛變端又見區夏騰沸人心動搖九廟
神靈不安歆享萬方蒸庶塗炭堪虞此皆朕一人之咎
也茲特布告天下誓與我國軍民維新更始實行憲政
凡舊法舊制有不合於憲政者皆罷除此次湘鄂亂事
雖涉軍隊實由瑞澂等乖於撫馭激變棄軍與無端搆
亂者不同朕維自咎用瑞澂之不宜軍民何罪果能翻
然改正決不追咎既往朕以眇眇之身立於臣民之上

禍變至此，悼心失圖，悔其何及！尙賴國民扶持，軍人翊戴，使憲政成立。因亂而圖存，轉危而爲安，惟望天下共知此意。資政院奏內閣應實負責任，國務大臣任用懿親，與立憲各國通例不符，請取消內閣暫行章程，實行責任內閣，不以親貴充當國務大臣。復請頒明詔，將憲法交院協贊，頒布實行。復奏請速開黨禁，以示寬大，而固人心。詔並允行。資政院總裁大學士世續辭職，以李家駒爲資政院總裁。民政大臣桂春以漢人革命，內城漢人宜盡行驅逐，昌言於朝，舉措乖謬，罷之。以趙秉鈞爲民政大臣。甲戌，湖南都督焦達峯副都督

陳作新爲亂兵所戕舉譚延闓爲都督 南昌兵變巡

撫馮汝騏走九江未幾死之 第二十鎮統制官張紹

曾頓兵灤州與協統盧永祥藍天蔚等合詞奏請迅組

責任內閣實行立憲祛除暴政詔嘉納之 乙亥內閣

總理大臣奕劻協理大臣那桐徐世昌度支大臣載澤

海軍大臣載洵外部大臣鄒嘉來等辭職允之詔授袁

世凱爲內閣總理大臣湖北海陸軍仍歸節制調遣

軍諮大臣載濤辭職詔以蔭昌代之 以魏光燾爲湖

廣總督 丙子張紹曾等復奏申前請詔復慰勉之

第六鎮統制官吳祿貞頓兵石家莊劫運鄂軍火并嚴